

1241-1241- OFP - Acta Capitulum Generalium Bononie Celebrati

In nomine patris et filii et spiritus sancti. Amen.

Acta capituli generalis Bononie celebrati
anno Domini · M° · CC° · XLII° ·

Revocamus hanc inchoacionem. ita quod in provincia ubi capitulum generale celebratur. ad capitulum non veniant. nisi diffinitor et socius eius. sicut de aliis provinciis. sed alio tempore provinciale capitulum celebretur.

Item. Confirmamus has constituciones. Ubi dicitur de annunciacione mortis magistri. addatur. quod domus Parisiensis anunciet provincie Dacie. Bononiensis vero; Polonie. Terre sancte Grecie. et illud deleatur de constitucionibus. et aliis quibus poterit annunciare. Et hec habet · iii · capitula.

Item. Ubi dicitur. Scripturam publicent in medium. addatur. expressis nominibus eligencium et electorum. Et hec habet · iii · capitula.

Item. Ubi dicitur de diffinitore. nisi in priorem provincialem electus fuerit. addatur. et confirmatus. Et hec habet · iii · capitula.

Item. Ubi dicitur de priore conventuali eligendo. secundum formam canonicam eligatur. addatur. a maiori parte mediate eligencium. vel per compromissionem. vel per communem inspirationem. aliis subtilitatibus iuris relegatis. quod similiter in electione magistri ordinis. et priorum provincialium observetur. Et hec habet · iii · capitula.

Item. Quod dicitur in gravi culpa. Si indumenta vel alia fratri data vel concessa. sine ipsius licencia alius acceperit. ponatur in titulo de levi culpa. post illud. negligenter tractaverit. Et hec habet · iii · capitula.

Item. Ubi dicitur. predicatorum et alii fratres itinerantes contenti sint officio illorum ad quos quandoque declinant. residuum amoveatur. Et hec habet · iii · capitula.

Item. Ubi dicitur predicare non audeat. nisi habeat generale mandatum. amoveatur. generale. Et hec habet · iii · capitula.

Item. Ubi dicitur. frater qui in aliam provinciam ad legendum mittitur. omnes libros suos glossatos. postillas. bibliam. et quaternos. secum deferet. et si simpliciter illi provincie ad quam mittitur assignetur. libri quos habuit de provincia de qua mittitur. ipso mortuo ad illam provinciam pertinebunt. alii vero omnes sint illius provincie ad quam mittitur. sive in via. sive in provincia moriatur. Si vero ad tempus mittitur. omnes libri ad provinciam de qua assumptus est; revertantur. Idem dicitur de missis de provincia ad provinciam. non ad regendum. non tamen portent nisi bibliam. breviarium. et quaternos. Et hec habet · iii · capitula.

Item. Ubi dicitur. quod socius obediat in omnibus predicatori; removeatur. in omnibus. Et hec habet · iii · capitula.

Item. Removeatur quod dicitur de Cisterciensibus non recipiendis absque licencia domini pape. Et hec habet · iii · capitula.

Item. Generale statutum ordinis. vel consuetudinem diu optentam. et communiter approbatam in ordine. nec magister ordinis nec priores provinciales aliquatenus valeant immutare. nisi per tria capitula fuerit approbatum. Et hec habet · iii · capitula.

Item. Quod solus epdomadarius capa serica utatur. tam in choro quam in processione. Et hec habet · iii · capitula.

Item. Diffinitores excessum magistri corrigant seorsum et emendent. quod si prevaricator ordinis fuerit aut contemptor aut adeo negligens. quod ordinis dissolutionem inducat; moneatur a diffinitoribus. ut magistratui cedat. et locum ad manendum sibi eligat. alioquin ammovendi ipsum ab officio liberam habeant potestatem. et alia forma removeatur. Et hec habet · iii · capitula.

Approbaciones.

Approbamus hanc addicionem. Cessio magistri non admittatur a diffinitoribus. nisi propter aliquid predictorum. aut propter defectum. aut impotenciam. que ipsum ab executione officii magistratus perpetuo impediret. et hec precipimus firmiter observari. Et hec habet · ii · capitula.

Item. Ubi dicitur. mortuo priore provinciali vel amoto. donec prior eiusdem provincie. sit electus et confirmatus. addatur. et ipse vel ille cui vices suas commiserit; presens in provincia extiterit. Et hec habet · ii · capitula.

Item. Ubi dicitur de supprior. et in aliis quantum ei prior assignaverit vel permiserit. addatur. Idem autem supprior. mortuo priore vel amoto. vices eius in omnibus plenarie optineat. quousque prior fuerit electus et confirmatus. et in domo presens extiterit. vel prior provincialis aliud ordinaverit. Et hec habet · ii · capitula.

Item. Ubi dicitur. quod capitulum generale uno anno Parisius. alio anno Bononie celebretur. addatur. nisi magistro ordinis et diffinitoribus. ex causa legitima quandoque aliud videatur.

Item. Ubi dicitur. quod si diffinitor non possit venire ad capitulum generale. ipso iure socius eius. loco ipsius. diffinitor habeatur. addatur. quod si alterum ipsorum. predicto modo impediri contigerit. primus conventus ad quem declinaverit. teneatur ei de competenti socio itineris; providere; et litteras testimoniales sue electionis ad capitulum secum ferant.

Item. Quod de quarto in quartum annum. mittantur visitatores per provincias a capitulo generali. qui sui officii tunc ab ipso capitulo. limitatam habeant potestatem.

Item. Ubi dicitur. quod · iiiior · fratres eligantur ad visitandam provinciam. addatur. vel plures secundum quod capitulo provinciali videbitur expedire. qui omnes teneantur sequentis anni capitulo interesse.

Item. Ubi dicitur; litteras testimoniales secum ferant. et in conventibus ad quos declinaverint. de excessibus suis ibidem corrigantur. addatur. in quacumque autem provincia fratres itinerantes deliquerint. prior provincialis vel conventualis. in cuius terminis inventi fuerint. ipsos sicut suos fratres. corrigendi liberam habeant potestatem.

Item. Ubi dicitur. quod prior conventualis. ubi debet provinciale capitulum celebrari. vices eius optineat. addatur. nisi magister vel generale capitulum. alteri commiserit.

Item. Ubi dicitur. audito primo signo surgant fratres. dicendo. etc. deleatur dicendo. et addatur. et stando dicant matutinas de beata virgine.

Item. Quod priores conventuales postquam duobus annis continuis fuerint ipso iure sint absoluti. Similiter priores provinciales de quarto in quartum annum ipso iure sint absoluti. nisi electio magistri sit ipso anno celebranda. vel illorum sit diffinitio. et tunc terminato capitulo sint absoluti.

Iste sunt admoniciones.

Monemus ut pulmenta cocta cum carnibus. vel sanguine. a domibus hospitem. penitus amoveantur.

Item. Ne fratres ante · xxv · annos ad sacerdotium promoveantur.

Item. Ne subpriors dentur in socios prioribus ad capitulum generale vel provinciale.

Item. Ne aliquo modo fiant discantus a fratribus nostris in ecclesiis nostris vel alienis.

Item. Volumus et mandamus. ut vivaria artificiosa. a domibus nostris removeantur. et vinee preter quam ad comestionem et agrestam faciendam. extirpentur.

Item. Monemus. quod fratres nostri sollicite servent pacem prelatorum et fratrum minorum.

Item. Quod fratres se exercent studiosius in hiis que sunt contra hereticos. et ad fidei defensionem.

Item. Monemus priores. ne in scandalum ordinis nostri. fugitivos et apostatas nostros in aliis religionibus stare. vel alias vagari permittant. sed utantur contra eos privilegiis ordini nostro concessis.

Item. Ne aliqua fiat dispensacio sanis in vino in tota die parasceves.

Item. Monemus et volumus. quod abradatur de legenda beati Dominici. ubi semetipsum asserit. licet in carnis integritate divina gracia conservatum. nondum illam imperfectionem evadere posse. quin magis afficeretur iuencularum colloquiis. quam affatibus vetularum.

Item. Ecclesie nostre de nocte secularibus non aperiantur. nisi forte in totis duplicibus. et tribus noctibus tenebrarum.

Item. Monemus de silencio in toto choro clericorum et conversorum servando.

Item. Fratribus qui monialibus. vel aliis religiosis mulieribus sacramentum extreme unctionis administraverunt. vel prelatos earum instituerunt vel destituerunt. vel officium visitacionis in earum domibus exercuerunt. iniungimus · vii · dies in pane et aqua. · vii · psalmos et · vii · disciplinas et in virtute obediencie districte precipimus. quod a talibus abstineant. et eas de cetero non communicent. Qui autem eas visitaverint; non excusentur ab hac pena vel precepto propter litteras domini pape. nisi in eis contineatur. non obstante privilegio. etc. vel domini pape preceptum speciale. Nec aliquis fratrum de cetero sermones vel collaciones vel alias sacras scripturas. de latino transferant in vulgare.